

无上秘要卷之七十四

見三

啟志願品

帝君五願求仙上法常以九月九日十月五日三月三日四月八日七月七日此五願十會之時也上登太極瓊臺玉殿金室之內存

五願於閭官希玄真以自降虛无啓以玉章金音暢於太空召五帝以衛靈慶萬會於丹房故有感而致真真感發而降焉是其日當沐浴清齋入室燒香心拜四方正東向平生東向是常陽始暉之方也叩齒三十六道

第一上願我生自然之氣氣結成我身身與三光齊輪長享无極之根

二願我身常處太空之上瓊宮玉房之裏朝與玉帝同宴夕與玄母同几渴滄浪并洪泉玉芝飢納龍胎瓊腴絳樹赤子

三願我身生萬怪七十二光奇毛異骨飛羽友黨乘虛駕空出入帝宮眾慶來臻萬壽无疆

四願與无俱生與无俱死死而又生生為帝主封掌十天總領羣生

五願一切衆生已生未生同保日月三光有道之人七玄之祖上昇南宮天下之福靡有不當四方五願並會玉堂

次上願九玄扶養我身魂魄真神恒居我宮上通天仙下達洞淵願天願地願風願雲願神五願一合定籍長生天降紫煙地衛五靈乘雲駕虛飛鞏綠綰上造金闕進登玉清慶及七祖更受胎生

中願亦五得道本根願陰願陽願太空願太无願太玄上宴玉房與帝因緣遊眇生開披浪九天元父定籍玄母記年桃康結精保固丹田身騰金闕名書玉篇七祖解脫福慶來臻

下願亦五願太虛願太有願太真願神仙運身於五嶽之頂飄飄九霄之際出入開關之裏移脫死尸之外願天地為我父母三光衛身壽年萬神守九源之孔真靈降自然之氣八方五願舉駕而會玉願既畢叩齒三七通呪曰

太上元帝一玄經五雲散景鬱微三清玉童玉女燒香侍靈上願開陳與我合形使我神仙上昇帝庭比帝落死南極滋生東華金格得上我名无窮之願與我齊并咒畢又叩齒三七通仰咽炁五通止

此帝君開陳上願與靈合形之道常能爾者則玉華侍衛玉童散香上徹九天感應帝皇五年如此真神見形天下十方有道之願无不降予之情

右出洞真天關三圖七星移度經

帝君十二願篇目曰

願天願地願風願雲願陰願陽願太空願太无願太虛願太有願自生願神生

玄母八間篇目曰

願玄母與我俱生於生氣之間與我俱存於日月之間與我俱保於九天之間與我俱食於自然之間與我俱飲於匏河之間與我俱息於玉真之間與我俱寢於仙堂之間與我俱遊於三玄之間兆在別室常常讀是經不忘須臾此為內願帝君開善八間者矣今五嶽諸仙及神州仙女猶乃酌瓊膏而嚙麟脯

說大願陳八間期太素奉三元志宵晨為玉  
真校七世入廣寒豈況世中之庸猥五濁之  
微賤者哉當何可措而不修間而不為邪夫  
形神雖精苦於生生而七世有罪而不解者  
已亦必无仙冀也是須啓大願陳八間以釋  
其積結耳七考既福兆乃不死不死者乃得  
道之宗本為仙之根始忘行是業者可不免  
屬於長存哉

九天帝君十二願篇目曰

上願九靈玄母八門神簡迴元五通禳除世  
殃上福七祖身致神仙靜於密室散香正煙

而讀大洞金華經曰

北極天皇太乙帝君玉清紫虛二景明圓无  
上大道太素三元四方五老六蓋七晨八上  
九靈隱道迴元玄母五通金華高仙司命天  
師主生天神太微天氣以醮因緣上願九玄  
護魄扶魂明真元氣並來在身仰招无上五  
通太仙俯逮无下隱道迴元七世積罪今為  
告散受福南宮灑香八門願天願地願風願  
雲四願一合定籍長生天益胎根地助曜靈

神風八扇景雲流盈我與帝君同緝上清觀  
眇北玄解帶玉庭慶加七祖玄考利貞上願  
四達壽與日頌

中願亦四領理帝書願陰願陽願太空願太

无三五明神七九所居帝君元父定生之初

玉皇凝駕常在我廬我存紫房泥九桃康凝

陰固血魂生太陽靈空映暉太元履長空无

九氣與我黃裳七考介福受仙南宮

下願亦四長生仙府乃願太虛又願大有神

存九天形遊真宇帝君混合迴旋七九禍去

我室福來我取惡言消忘願言善念

復願自生天地為父復願神生和氣為母迴

元五通有除罪垢福冠七葉超生彌久願言

高皇帝君合唱唱音逸霄八響萬暢靈輪逆

衝千真同賞從劫至劫中常會十二慶大哉

帝君恩萬福迴元鏡又願八間玄母造神八

間之唱九靈洞眇

上願玄母與我俱生於生氣之間得使紫景

映虛天人合符飛真凌羽我與之俱天樂娛

心脫離百憂七玄構慶上靈所扶

次願玄母與我俱存於日月之間三光之際  
大帝併執青旄綠蓋華軒繡帳錦服玉帶携  
提五老同賓四大入宴華霄出眇八外

三願玄母與我俱保於九天之間乃凝真圓

雕表心内練氣溢雲靈感神萬千身升九霄

考福重玄散帶空洞撫輪累天吉亨七世更

生為人我保太真與日同年

四願玄母與我俱食於自然之間水離三陰

長會自然七寶玉胎金丹紫芒隱芝右極左

拾夜光鳳騰虎沫雲瓊瓊霜奇味一御身拂

太空

五願玄母與我俱飲於飽河之間而流津萬

崖既清且甘迴水玉精靈瀾碧藍上注絕霄

流源神堂橫波鬱踊鼓扇太空浮遊浩清飲

漱東蒙高揖霞震寄樂滄浪七考得仙介福

洋洋體誓九河所向咸康

六願玄母與我俱息於玉真之間浩哉上座

淵邈霄清五老羅室玉華告靈西玉飛軒策

羽流軒與我俱息九玄之庭慶鍾七考受胎

更生身繫瓊宇神栖圖明

七願玄母與我俱寢於仙堂之間幽眇靈房  
玄華四陳朱宇鳳構明光映軒金床玉榻紫  
帷龍門上座玄皇中帝天真我處其右携帶  
纏綿大福七考受書更仙

八願玄母與我俱遊於三玄之間乃逸轡太  
漠迴軒三玄五靈扶骨玉母比有舞輪神丘  
停駕九天定書太上受位為真雌一元混從  
億至千洞經八響七祖獲仙從劫至劫常會

八間八間在何永哉因緣五老降福道德說  
說萬氣上生固保泥丸言願既早日月同年  
太哉虛生母動靜八門間

右出洞真隱元五晨金華玉經  
凡八節之日皆三天仙靈朝宴禮會之日也  
兆修行禮願朝神之時皆當齋用此日至於  
朔望朝禮非上法凡是其日欲行禮願陳祝  
之時當先叩齒七通心拜四方微祝曰  
上清玉帝三素元君太上高靈仙都大神今  
日吉日八願開陳上願飛霄長生神仙中願  
天地合景風雲下願五藏與身常存次願七  
祖釋羅脫愆又願帝君破伐胞根六願世世

智慧開分七願滅鬼馘斬六天八願降靈徹  
見東西上願一合莫不如言願神願仙上朝  
三元祝畢又拜如初亦適意所陳求解脫七  
祖之愆羅及首身之罪狀以續於行事之後  
也此名為三元八朝隱祝上願神仙之要法  
也行之三年則七祖父母及己之罪都解釋  
矣後玉華降衛感會神明八願開陳必獲靈  
要之要契

右出洞真黃素四四方經  
道言若見居家妻子當願一切早出愛獄攝  
意奉戒

若見飲酒當願一切制於命門以遠禍亂  
若見彩女當願一切守情忍色志慕在賢  
若見淫人當願一切除棄邪念翹心禁戒  
若見婦人當願一切履信正化日入法門  
若見衆生當願一切推人無爭懷道安世  
若見善人當願一切時刻存念仰執其道  
若見惡人當願一切棄凶即吉不犯王法  
若見貧人當願一切損身施惠後受大福  
若見富人當願一切救濟萬物物世受祿

若見貴人當願一切承其教旨悉合典訓  
若見賤人當願一切勤修匪懈各得所為  
若見帝王當願一切奉仰王道孝如父母  
若見主相當願一切受其教制四方歸仁  
若見兵甲當願一切各念仁心天下讓賢  
若見王子當願一切日歌太平係國承家  
若見賢人當願一切履行其德道為世宗  
若見異學當願一切明解教本得道如神  
若見栖山道士當願一切悉見道門速得昇  
仙

若見教化當願一切親受聖教皆為淵博  
若見聖人當願一切尊禮侍見諸國晉瞻  
若見仙人當願一切真道悉成飛昇天堂  
若見城郭當願一切嚴整修飾以道為基  
若見大國當願一切歸崇慕德若水注海  
若見小國當願一切知止虛冲安其所居  
若見市朝當願一切羣賢雲萃悉弘正道  
若見靜觀當願一切功德龜龜天人得志  
若見齋戒行香當願一切道德日新序序雅  
正

若見誦經當願一切盡上高座咸聽聖旨  
 若見樓觀當願一切洞視十方无有隱蔽  
 若見高山當願一切立德如彼无復退轉  
 若見大海當願一切智思无量輔成家國  
 若見栢樹茂林當願一切學成儒宗養徒教  
 教

若見淨手當願一切常執經書无時暫輟  
 若見善口當願一切耽誦洞經日新不厭  
 若見動足當願一切超步三界飛行上清  
 若見靜止當願一切滅景停真安閑空寂  
 若見飲食當願一切棄累入淨存得道味  
 若見大藏當願一切除其災害施為福田  
 若見疾病當願一切以道自庇免此苦厄  
 若見死喪當願一切學道常存濟度三塗  
 若見漁獵當願一切不為罪始終入无為  
 若見夷狄當願一切實玉中國不生邊地  
 若見少年當願一切及時學問遂成令名  
 若見老病當願一切以道攝生不更衰耄  
 若見三光當願一切並明靈曜開冥即消  
 若見雲雨當願一切惠澤盈溢无所不宜

若見素雪當願一切常居潔白道遙自在  
 若見靈風當願一切蓋像披散德流遐邇  
 若見深水當願一切洗垢清虛平等其心  
 若見名香當願一切受安芳感眾穢肅然  
 若見好華當願一切樂敬諸聖相好具足

若見車馬當願一切得道无為乘風駕龍  
 若見絃歌當願一切玩經散說以道娛樂  
 若見福食當願一切无不飽滿世享天厨德  
 流主人如水歸海宗廟亂長常居貴盛世與  
 四華俱生王家

若見致悔當願一切禍滅九陰福起十方德  
 如山海莫不興隆七世生天子孫賢忠富貴  
 巍巍所欲皆從學道飛仙駕雲乘龍道士生  
 卧常念願我四大合德同體道真

右出洞玄定志經  
 學道由丹心 奉師如至親 抱景偏情虛  
 孜孜隨日新 衆人未得度 終不度我身  
 大願有重報 玄德必信然 陰惡罪至深  
 對來若轉輪  
 右出洞玄隱注經

仙公請問太極真人高上法師曰人根本行  
 何修而見世受福家門端正子孫昌盛與善  
 因緣世世不絕上生天堂下生人間侯王之  
 家聰明儒仁敬信經教愛樂山水常誦微言  
 終得仙道

法師答曰善哉子之問也夫人生各有本行  
 宿緣命根種種相因願願相隨以類相從展  
 轉相生禍福相引是以世世不絕玩好不同  
 用心各異皆由先願也欲修道結緣賢聖當  
 奉行大戒廣建福田弘始功德或致飛仙或  
 致天仙或致地仙或致命過生天堂或致為  
 鬼神或致為六天大魔王官屬或致命過徑  
 生侯王之家人中之尊或為一切所仰賴富  
 有天下或致才智聰明或致姿容端偉聲氣  
 清香或致人愛念孝貞潔簡素或致善為文  
 翰動靜可則或致威嚴震肅禮越所難或致  
 篤好三寶供養滿勤愛樂山水清淨既經燒  
 香齋戒或致禮拜玄宗或致轉女為男華容  
 秀穎或致家門肅清世世因緣願其本願善  
 賢來生為我子孫安貴无極或致見世收福

命終受報或致後生獲慶得我宿功夫道何為哉以無心而應衆生四輩修福德嘗有本願福之報也皆緣于平時立願耳功德既設志願亦定其報乃猶暮以待旦矣世間人民偽薄不信法言各稱鬼魅自用其意輕忽宿命以為妄造誹笑至經以為虛誕而厚積嗜慾坐施立待報望速而應悠遠今玄教遲味世道交喪天人塗炭皆由其身立行致之太上所以痛心矣

南極上元君曰夫求仙之道皆當先願而後求願感而致靈亦願之大也願亦无所不包福亦无所不覆慶亦无所不流可謂願善矣若能精心在願願亦无不響應

右出洞玄請問經  
元上祕要卷之七十四

卷七十五原缺

元上祕要卷之七十六

服五氣品

見

元始赤書五篇真文生於太空之中天地未光開闢未明潛結元根三景成玄五氣行焉五色分彩煥照五方置以五帝導以陰陽輪轉九天之紐運明五星之光植五嶽以安鎮澳五府以養神是以至真之人常依陽光之始明上導元始之炁下引玉泉之流芳致元精於太極招五帝於靈童溉之者不衰存之者无窮迴萬劫而更始保五牙於顏容實靈寶之妙訣恢萬聖之玄宗

修養青牙導引東方九氣青天之法

常以立春之日雞鳴入室東向九拜平坐叩齒九通思東方安寶華林青靈始老君姓爛諱開明字靈威仰形長九寸頭戴青精玉冠衣九氣青羽飛衣駕乘蒼龍之輿建臨旗從神甲乙胡老之官九十萬人從九氣青天中下來降室內須臾化生青氣鬱鬱如雲之沓煙貫覆已形從已口中而入直下肝府又思木星煥明東方光照我身皆令分明竟便開

目仰呪曰

九氣青天元始上精皇老尊神衣服羽青役御天宮煥明歲星散輝流芳陶溉我形上餐朝霞服引木精圓養青牙保鎮朽家肝府充溢玉芝自生迴年億劫色反童嬰五氣混合天地長并畢引青氣九咽止便服東方赤書玉文十二字

右十二字則九氣青天之名導引青帝九氣服食青牙皆朱書白紙上存思訖而頓服之則氣不招而自降青帝應聲而見形五牙堅固於東嶽肝府玉芝而自生靈童齋真文於寢側青要輔翼而使今九年積感變化立成神仙度世萬劫不頽

常以雞鳴陽光始分東向叩齒九通摩兩掌今熱以手掌拭面目九過仰呪曰

東方九華服食青牙延我壽算飲以朝霞畢便以舌料上齒之裏齧脊三過今玉泉滿口咽之三過又引青氣九咽今鎮肝府之中畢修養丹牙導引南方三氣丹天之法常以立夏之日雞鳴入室南向三拜平坐叩